



Komunikadu Imprensa Tribunál Distritál Dili 25 Juñu 2019

JSMP konsidera pena prizaun tinan neen ba arguidu krime koasaun seksuál ho natureza inestu hasoru nia-oan fetu na'in rua la adekuadu

JSMP konsidera aplikasaun pena prizaun tinan neen (6) ba arguidu JM ne'ebé provadu komete krime koasaun seksuál ho agravasaun ho forma violénsia doméstika hasoru BCM (tinan 23) no DCM (tinan 17) no ofensa ba integridade fízika simples hasoru RCM (tinan 20), iha 31 Maiu 2019, iha Tribunál Distritál Dili, la adekuadu no la justu.

JSMP husu ba tribunál atu tenke konsidera sirkunstánsia hotu-hotu ne'ebé haleu krime ida-idak tuir padraun no prinsípiu sira iha lei penál nune'e fó pena ne'ebé adekuadu no justu ba arguidu.

"Desizaun ba kazu ne'e husik hela preokupasaun sériu ba konsisténsia tribunál sira iha kazu sira ne'ebé akontese iha âmbito família (aman hasoru nia oan sira), tanba tribunál aplika pena ki'ik liu kompara ho krime ne'e nia seriedade. JSMP rekomenda ba tribunál atu dezenvolve matadalan ida kona-ba sentensa ba kazu violénsia bazeia ba jéneru hodi hatuun desizaun ne'ebé konsistente, rigorozu, adekuadu no justu", dehan Diretór Interinu JSMP, Casimiro dos Santos.

JSMP observa katak iha leitura akordaun ne'e, tribunál hatudu pozisaun forte katak la fiar ba arguidu nia deklarasaun katak nia (arguidu) la komete violasaun seksuál hasoru lezada na'in rua no arguidu so hirus no baku deit lezadu RCM.

Tribunál konsidera arguidu provadu komete koasaun seksuál ba oan rasik. Tribunál dehan katak arguidu la hatudu nia arepimentu durante julgamentu nu'udar sirkunstánsia agravantes ne'ebé hatodan arguidu ninia hahalok. Tribunál hola pozisaun atu fiar liu ba lezada sira tanba lezada sira nia espresaun no sira mós deklara katak sira perdua ona arguidu maibé sira husu atu arguidu labele repete tan nia hahalok hasoru sira. Infelizmente tribunál ninia desizaun finál kontráriu ho pozisaun tribunál nian rasik.

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275
Telefone: 3323883 | 77295795
www.jsmp.tl

Facebook: www.facebook.com/timorleste.jsmp
Twitter: @JSMPtl

JSMP sente estrañu tanba iha desizaun tribunál konsidera sirkunstánsia agravante sira hanesan arguidu la arrepende ninia hahalok, la konfesa ninia hahalok no kontinua mantein katak nia baku deit lezada sira maibé iha aplikasaun pena tribunál fó pena tinan 6 prizaun ne'ebé la adekuaudu no la reflète tribunál ninia pozisaun inisiál.

Tribunál konklui katak arguidu provadu komete krime koasaun seksuál hasoru nia oan-feto nain rua. Tribunál mós prova arguidu komete krime ofensa ba integridade fízika simples hasoru nia oan mane (RCM). Entretantu relasiona ho krime violasaun seksuál hasoru nia oan fetu na'in rua refere, tribunál la prova faktu ne'e.

Ba krime koasaun seksuál ho agravaasaun hasoru lezada na'in rua tribunál kondena arguidu ba kada krime ho pena prizaun tinan 5. Entretantu ba krime ofensa ba integridade fízika simples hasoru lezadu, tribunál kondena arguidu ho pena prizaun fulan 8 (ualu).

Bazeia ba artigu 36 KP kona-ba punisaun iha konkursu, tribunál soma pena hosi krime tolu refere no konklui tinan 6 prizaun ba limite mínimu no limite másimu tinan 10 fulan 8 prizaun. Tribunál konsidera krime ne'e agrava tuir artigu 173 (a) no kondena arguidu ho pena úniku tinan 6 prizaun.

JSMP hanoin katak pena úniku tinan 6 prizaun ne'ebé tribunál hatun ba arguidu ki'ik teb-tebes ho konsiderasaun:

1. Moldura penál hosi artigu 173 letra (a) kona-ba agravaasaun ba krime koasaun seksuál ne'ebé hosi tinan 4 to'o 12 prizaun kuandu envolve relasaun famíliar, tutelár ka kuratelár, dependénsia irárkia, ekonómika ka laborál. JSMP konsidera pena prizaun tinan 6 besik liu ba iha pena mínimu ka liu deit tinan 2. Ida ne'e la adekuaudu no la reflète ho tribunál nia konsiderasaun kona-ba sirkuntánsia agravante no agravaasaun iha artigu 173 KP refere.
2. Artigu 54 (b) KP kona-ba abitualidade kriminál, sei aplika pena efetiva no hasae datoluk-ida, iha nia limite mínimu no másimu bainhira arguidu komete krime ida-idak to'o krime tuir mai seidak liu tinan tolu. Iha kazu ne'e, arguidu komete koasaun seksuál hasoru lezada BCM no DCM iha loron tutuir malu no krime ofensa ba integridade fízika simples dala barak. Ikusliu akontese tan dala ida depoisde semana ida hosi akontesimentu krime koasaun seksuál.

Antes ne'e prokuradór akuza katak iha 12 Marsu 2018, iha tuku 24:00 kalan, arguidu bolu lezada BCM atu koi nia kotuk-laran no bainhira lezada koi hotu tiha arguidu nia kotuk-laran, arguidu ho forsa obriga kolu lezada nia roupa no halo relasaun seksuál to ezekula. Depoisde akontese tiha, arguidu ameasa lezada atu la bele fó sai ba ema seluk.

Iha 13 Marsu 2018, bainhira lezada BCM haree hela televizaun, arguidu bolu lezada atu halo tan relasaun seksuál maibé lezada lakohi. Arguidu hakbesik ba lezada no kaer lezada nia kidun no

vajina. Lezada tenta atu hakilar maibé arguidu buti lezada nia kakorok no ameesa lezada atu la bele hakilar. Iha loron, fulan no tinan ne'ebé la apura, bainhira lezada BCM haris iha haris-fatin, arguidu tenta hafuhu lezada BCM no lezadu RCM mak kaer toman no hasee kedas arguidu.

Iha 05 Maiu 2018, iha tuku 05:00 madrugada, arguidu bolu lezada DCM ne'ebé sei toba no bainhira lezada hadeer mai, arguidu lolo nia liman rua ba lezada nia hirus-matan no hateten ba lezada katak "boot ona ka?". Hafoin arguidu kaer lezada nia isin, lezada dehan ba arguidu katak "*apa kaer fali ita nia isin loloon ka?*" no arguidu responde katak "kaer deit sa".

Depois ida-ne'e iha tuku 18:00 lokraik, iha loron hanesan, arguidu dehan ba lezada DCM katak "ó hakarak ita nain rua toba ka...? no lezada hatan ba arguidu katak nia lakohi!. Haree ba arguidu nia hahalok hanesan ne'e, iha kalan ne'e kedas lezada DCM ba toba iha nia bin nia uma.

Iha 12 Maiu 2018, iha tuku 14:00 lokraik, arguidu ba iha viziñu nia uma no ho kondisaun lanu. Nune'e lezadu RCM haruka nia alin feto ida ba bolu arguidu fila ba uma. Bainhira arguidu to'o iha uma, lezadu RCM lamenta no koalia ba arguidu katak "Apa tanbasá mak hemu nafatin tua ne'e?". Arguidu hatan ba RCM katak "ó la manda hau" no arguidu ameesa atu soe lezadu ba rai kuak kuandu lezadu hakarak mete hela deit arguidu. Antes ne'e, arguidu mós sempre baku lezadu.

Prokuradór akuza arguidu kontra krime violasaun seksuál no koasaun seksuál iha artigu 171, 172 KP no agrava ho artigu 173 letra (a) KP hasoru lezada BCM no DCM konjuga ho artigu 2, 3(c) 35(b) no 36 Lei Kontra Violénsia Doméstika. Prokuradór mós akuza arguidu kontra artigu 145 KP kona-ba ofensa ba integridade fízika simples konjuga ho artigu 2, 3(c), 35(b) no 36 LKVD.

Iha julgamentu arguidu nega totál faktu sira iha akuzasaun prokuradór nian no deklarata katak nia oan sira kesar nia tanba arguidu sempre baku sira bainhira lanu. Entretantu lezada DCM kontinua konfirma faktu sira iha akuzasaun no deklarata katak uluk bainhira nia inan (arguidu nia feen) sei moris, arguidu nia hahalok la hanesan ne'e.

Iha parte seluk, lezada BCM deklarata katak arguidu la kolu nia ropa no la halo violasaun seksuál maibé kose deit nia penis ba iha lezada nia kotuk-laran no kaer lezada nia susun.

Lezadu RCM konfirma faktu katak nia toman arguidu hafuhu lezada DCM bainhira hariis no deklarata katak arguidu sempre halo agresaun hasoru lezadu bainhira lanu maibé lezadu la ba hato'o keixa. Entretantu kona-ba akontesimentu sira seluk hasoru lezada na'in rua, lezadu deklarata ba katak nia la haree ho matan maibé nia hetene bainhira lezada na'in rua konta sai ba nia.

Testemuña TPC nu'udar lezadu no lezada sira nia bin depoimenta katak nia la hatene akontesimentu hirak ne'e. Testemuña mós dehan katak iha momentu nia alin DCM ba toba iha nia uma mós la konta buat ruma ba nia.

Iha alegasaun finál, prokuradór konsidera arguidu provadu prátika krime violasaun seksuál no koasaun seksuál agravaun hasoru lezada BCM. Arguidu provadu prátika krime koasaun

seksuál ho agravasaun hasoru lezada DCM no prátika krime ofensa ba integridade fízika simples hasoru lezadu RCM ho natureza violénsia doméstika.

Bazeia ba faktu provadu hirak ne'e, prokuradór husu ba tribunál atu kondena arguidu ba krime ofensa ba integridade fízika simples ho natureza violénsia doméstika hasoru lezadu RCM ho pena prizaun fulan 3, ba krime koasaun seksuál hasoru lezada DCM, husu tinan 3 prizaun no ba krime violasaun seksuál ho agravasaun hasoru lezada BCM, husu pena prizaun tinan 6.

Hosi pena hirak-ne'e, prokuradór husu ba tribunál atu aplika pena úniku la bele aas liu tinan 20 no la bele ki'ik liu tinan 6 prizaun.

Entretantu defeza konsidera arguidu provadu komete krime ofensa ba integridade fízika simples hasoru lezadu RCM no krime koasaun seksuál ho agravasaun hasoru lezada DCM maibé ba krime violasaun ho agravasaun ba lezada BCM defeza dúvida tanba iha deklarasaun lezada BCM nian ba tribunál katak arguidu so kose nia orgaun seksuál ba lezada nia kotuk laran. Ho razau hirak ne'e, defeza husu ba tribunál atu aplika pena ne'ebé adekuaudu no justu ba arguidu.

Kazu ne'e rejistu iha tribunál ho Nú. Prosesu 0088/18 PNSIC. Julgamentu leitura akordaun ne'e prezide hosi juis singulár Dra. Sribuana da Costa ne'ebé representa juis kolektivu. Prokuradór representa hosi Dr. Bartolomeu de Araújo no arguidu hetan defeza hosi Dr. Juvínál Yanes Freitas hosi Defensória Públiku.

Atu hetan informasaun kle'an liu tan favor kontaktu:

Casimiro dos Santos

Diretór Interinu JSMP

Email: santos.cas76@gmail.com

Telefone: (+670) 77257466 | 3323883

Website: <http://jsmp.tl/>